



大宋文鑑卷之三十一

詔類

辛酉京詔

祖宗并配詔

賜中書門下詔

皇太后還政議合行典禮詔

通商茶法詔

求直言詔

賜中書門下置寶文閣學士待制詔

禁內降詔

立皇子詔

為兩穴許言待政闕失詔

盧

宋

歐陽

歐陽

歐陽

韓

張

胡

王

王

修

修

修

修

維

方

宿

圭

圭

圭



封太祖皇帝後詔

王珪

皇太后付中書門下還政書

王珪

太皇太后賜門下詔

蘇軾

太皇太后賜門下詔

蘇軾

合祭天地詔

范祖禹

元符日食求言詔

曾肇

賜夏國主詔

韓琦

賜觀文殿學士禮部尚書王舉正不允詔

歐陽脩

賜夏國主詔

歐陽脩

賜南平王李德政日曆詔

宋祁

賜判永興軍韓琦再乞相州不允詔

王安石

賜守司徒檢校太師兼侍中韓琦詔

王安石

賜富弼乞判汝州允詔

王安石

賜知亳州歐陽脩乞致仕不允詔二道

王安石

賜荅魯公亮詔

王安石

賜特放知潭州燕度待罪詔

王安石

賜宰臣韓琦不赴文德殿立班待罪不允詔

王珪

賜河陽三城節度使兼侍中魯公亮乞免冊禮允詔

王珪

賜判亳州富弼乞罷使相不允詔

王珪

賜吳奎免恩命不允詔

王珪

戒諭夏國主詔

王珪

賜宰臣韓琦請郡不允詔

呂公著

賜王廣淵張詠獎諭詔

元絳

賜新除落致仕依前光祿大夫范鎮赴闕詔

蘇軾

賜尚書刑部侍郎范百祿乞外任不允詔蘇

軾

泂路賜奉安 神宗皇帝御容禮儀使呂大防銀合茶藥

蘇軾

賜阿里骨詔

蘇軾

賜正議大夫知鄧州蔡確乞量移弟碩乞詔

蘇軾

賜端明殿學士銀青光祿大夫致仕范鎮獎諭詔

蘇軾

賜觀文殿大學士集禧觀使蘇頌乞致仕不允詔

范祖禹

賜新除觀文殿大學士中太一宮使范純仁令赴闕供職

詔

曾肇

辛酉京詔

盧多遜

定鼎洛邑我之西都燔柴泰壇國之大事况削平江表底定南方
惟率土之混同自上天之鑒祐內慙涼德感是洪休得不罄以恭
虔申其告謝瞻惟京而西顧兆陽位於南郊且籙陳有楚之儀恭
稷奉惟馨之薦朕今暫幸西京取四月內筵日有事於圓丘宜令
有司各揚其職禮容儀衛典故在焉祇事肅成無或煩擾諸道州
府不得以進奉為名輒有率斂凡在中外當體予懷

祖宗升配詔

宋綬

朕聞王者奉宗廟貴功德禋天祀地必有侑神作王之尊審諦合
食則有百世不遷之重朕以寡薄獲承天序寔賴 先烈克臻治

下懼不能揚 祖宗之休丕顯懿鑠夙夜惟念弗違寧居恭以
太祖皇帝奮淳耀之精輯樂推之運一登五代澆李中華剖裂英威
一震罔不率俾夷僭黜暴皇綱再張萃其桀鷩納諸軌度規摹闡
遠詒萬世法 太宗皇帝躬盛聖之資乃膺繼體及來閩粵復汾
晉方夏一統尉候萬里興文教拔羣材思皇政經憂勞庶務惠澤
漸清浹人骨髓 真宗皇帝欽明孝熙恢續鴻緒勤儉以率下宸
矜以謹刑撫和二邊兵不復用民瘼知役物遂其生因時昭恭憲
章考古登封巡祭聲明焯耀享國多載仁恩溥博音商周之際則
長發大禘嚴父配天逮於漢氏亦能尊二宗立廟樂朕甚慕之肆
我 藝祖之受天命建大業可謂有功矣 二聖繼統重雍累洽
可謂有德矣其令禮官稽按典籍辨崇配之序定二桃之位中書
門下等加詳閱稱朕意焉

賜中書門下詔

歐陽 脩

朕繼承丕基撫有方夏謂教之不可以家至而行之每務於身先
惟是儉勤敢忘勉勵期與羣庶臻于富康而人殆久安驕於佚欲
物豐大盛耗以浮虛苟奉養以自私忘僭奢之為矣士民交黷貴
賤靡分惟其彊力之能無復等威之制考於著令雖有舊章顧在
攸司鮮聞用法民遂安於常習弊罔革以滋深紀綱既紊於度程
風俗以至於流蕩俾朕有欲治之意不能副余之誠心而民多自
陷之愚未免煩余之訓導夫令信由於貴始下化先於上行眷予
一二之臣其率庶工而警職俾爾多方之衆勿踰常憲法以于
刑庶漸革於侈風以共趨於治路凡后室之制器用之度冠服之
章妾媵之數其令中外臣庶遵守前之條詔如有違犯仰御史臺
及開封府糾察聞奏其諸路州軍即委轉運使提點刑獄臣察及

逐處長吏施行布告中外咸使聞知

皇太后還政議合行典禮

歐陽脩

朕頃以嗣承大統方執初喪過自摧傷遂嬰疾恙皇太后尊君母道時邁家難閱余哀荒俯徇誠請勉同聽覽用適權宜賴保護之勤叨獲清明而東復恭惟坤德之至靜實厭事機之久頌殆此彌年荐承諄誨顧寔繁於庶政難重浼於睿慈然而方國多虞則共濟天下之務惟時無事亦宜享天下之安先民有言無德不報雖日以三牲之養未足盡於予心而刑于四海之風必務先於孝治惟是事親之禮蓋存有國之規當極尊崇以稱朕意應合行儀範等事令中書門下樞密院參議以聞

通商茶法詔

歐陽脩

古者山澤之利與民共之故民足於下而君裕於上國家無事刑

罰以清自唐末流始有茶禁上下規利垂二百年如聞此來為患益甚民被誅求之困日惟咨嗟官受濫惡之入歲以陳積私藏盜販犯者寔繁嚴刑峻誅情所不忍使田閭不安其業商賈不通于行嗚呼若慈是於江湖間幅負數千里為陷穿以害吾民也朕心惻然念此久矣間遣使者往就問之而皆謹然願弛權法歲入之課以時上官一二近臣忤其狀朕嘉覽于再猶若憊然又於歲輸裁成其數使得饒阜以相為主刻去禁條俾通商賈歷世之弊一旦以除著為經常弗復更制損上益下以休吾民尚慮喜於立異之人緣而為姦之黨妄陳奏議以惑官司必賞明刑用戒狂謬布告遐邇體朕意焉

求直言詔

韓維

朕涉道日淺昧于致治政失厥中以至于陰陽之和乃自冬迄春旱

曠為虐四海之內被災者廣間詔有司損常膳避正殿冀以塞責
消變歷日滋久未蒙休應敷敷下民大命近止中夜以興震悸靡
寧永惟其咎未知攸出意者朕之聽納不得於理歎獄訟非其情
歟賦歛夫其節歟忠謀讜言鬱於上聞而阿諛壅蔽以成其私者
衆歟何嘉氣之久不效也應中外文武臣寮並許寔封直言朝政
闕失朕將親覽考求其當以輔政理三事大夫其務悉心交儆成
朕志焉

賜中書門下置寶閣學士待制詔

張方平

昔我藝祖神武不殺誕昌寶祚太宗修文德以光大業貞
宗崇儒術以承休命仁宗善繼謨烈化成治定咸有述作煥于
簡編河漢昭回奎璧相照迺魂曾構遂在西清上憲帝裁書之府
章累朝稽古之盛並揭嘉名以登峻望俾服凝嚴之職因為咨訪

之地誠聖哲之遠業熙洽之高致也仁祖升遐先皇纂御首
命近列論次遺文鈿軸寶函未終緡錄白雲紫氣遽復上賓今畢
畢功甫將安奉大訓九歌之重垂世共長廣內祕室之藏貽謀無
極祗循故事適成先志寶文閣宜置學士待制著于令

禁內降詔

胡宿

朕紹承駿烈祗服先猷蹈道以臨庶邦慎憲而持大柄馭之予奪
正以賞刑悉任王公靡容紊法比有儉幸肆興妄圖或違理覬恩
或負罪希貸率求內出間亦奉行蠹政虧風莫斯為甚雖屢頒於
詔約曾未絕於私祈兼慮臣庶之家近貴之列交通請託巧詐營
為陰致貨賂密輸珍玩寘緣結納侵絜權綱方務澄清當嚴禁詰
儻復違犯斷在必行重念成湯以六事責躬女謁包苴之先戒管
氏以四維正國禮義庶恥之具張烈宗祀之消成屬祥釐之均被

嘉與中外此非衰勉于自新以隆至治今後應內降指禪特與
恩澤及原減罪犯者並仰中書樞密院并所承受官司具前後詔
條執奏不得施行及臣庶家如有潛行貨賄結託貴近者並令御
史諫官覺察論奏咨爾丞弼體朕意焉

立皇子詔

王 珪

人道親親王者之所先務也蓋二帝之隆治繇茲出朕其慕之右
衛大將軍岳州團練使_{英宗}皇兄濮安懿王子猶朕之子也少鞠
于宮中而聰知仁賢見于夙成日者選於宗子近籍命以治宗正
之事使使者數至其第廼崇執謙退久不受命朕默然有嘉焉朕
蒙 先帝遺德奉承聖業罔敢失墜夫立愛之道自親者始固可
以厚天下之風而上以嚴夫宗廟也其以_{英宗}為皇子
為兩災許言時政闕失詔

王 珪

蓋聞古之聖賢在位陰陽和風雨時日月光星辰靜黎民阜蕃以
底休平朕甚慕之朕猥以眇身託于王公之上夙夜以思惟懼不
能以承 先帝鴻業而比年以來水潦為沴廼八月庚寅大雨京
師空廬墊傷被弱者衆大田之稼害于有秋竊迹災變之來曾不
虛發豈朕之不敏於德而不明於政歟將天下刑獄滯寃賦繇煩
苦民有愁歎亡聊之聲以奸其順氣歟不然則何天戒之甚也今
飭躬焦思欲銷復大異而未聞在位者之忠言進祈自新厥路何
繇焉應中外臣寮並許上實封言時政闕失及當世之利病可以
佐元元者悉心以陳毋有所諱執政大臣皆朕之股肱其協德交
修以輔朕之不逮

封太祖皇帝後詔

王 珪

昔我 藝祖皇帝之興以天發之期兵未始一血刃而卒再造區

夏其大謀盛烈被諸萬世而莫高焉朕奉承聖緒夙夜不敢康乃
顧後之子孫寔微弗顯而有司未嘗議封爵之文豈朕所以尊大
統推親親之意哉且積厚者其流遠施大者其報豐宜令中書門
下考大宗之籍以屬近而行尊者一人裂土地而王之使常從獻
于郊廟世世勿復絕

皇太后付中書門下選政書

王珪

日者昊天不弔先帝上賓遽揚末命之言方結未亡之痛而
皇帝踐祚之始銜哀過情忽傳詔於外廷請預聞於庶政載念承
邦之重累申還辟之文皇哀未回羣聽猶鬱顧人子之誠雖至然
國家之事靡安况日聽治朝躬發神明之斷出馳禁趨衆聞輿馬
之音百姓莫不交欣三靈以之薦祉吾嘗視前史之戒思案聖之
圖將退飭於母儀庸進疆於君德從容房闈不亦美歟昨權同聽

政事候 皇帝康復日如舊去歲兩曾降手書選政輔臣等並於
皇帝御前納下今來聖躬已安好其軍國事更不同處分故茲示
諭宜體至懷

太皇太后賜門下詔

蘇軾

皇帝嗣位于茲四年華夷來同天地並應而皇太妃以恭儉之德
鞠育之恩雖典冊以時奉行而情文疑有未稱 皇帝以祖考之
奉尊無二上而吾惟春秋之義母以子貴其推天下之養以慰人
子之心宜下禮部太常寺討尋如於典故有褒崇未盡事件令子
細開具聞奏

太皇太后賜門下詔

蘇軾

官冗之患所從來尚矣流弊之極實萃于今以闕計員至相倍徒
上有久閒失職之吏則下有受害無告之民故命大臣考求其本

苟非裁損入流之數無以澄清取士之源吾今自以躬身率先天下永惟臨御之始常教有司蔭補私親舊無定限自惟薄德敢配前人已詔家庭之恩止從母后之比今當又損以示必行夫以先帝顧託之深天下貢望之重苟有利於社稷吾無愛於髮膚矧此恩私實同毫末忠義之士當識此誠各忘內顧之心共成節約之制今後每遇聖節大禮生辰合得親屬恩澤並四分減一皇太后皇太妃准此

合祭天地詔

范祖禹

朕聞五帝不相必樂三王不相襲禮世有損益因時制宜惟我祖宗嚴奉郊廟當遣官攝事皆考合於前文唯奠玉親祠自裁成於大禮每以三歲對越二儀咸秩百神大賚四海迄先帝元豐之末講方丘特祭之儀蓋將補一代之闕容振百王之墜典朕准

葬德嗣守丕基

列聖已行謹當遵奉

先朝未舉懼不克堪是

以昔歲仲冬竭誠大祀神祇饗答

祖考燕寧前詔有司載加集

議猶欲咨度諸儒之論稽參六藝之文然理既不疑則事無可議斷自朕志協于僉言祇率舊章永為成式今後南郊合祭天地依元祐七年例施行仍罷禮部集官詳議

元符日食求言詔

曾肇

朕以眇身始承天序任大責重罔知攸濟永惟四海之遠萬幾之煩豈予一人所能徧察必賴百辟卿士下及庶民敷奏以言輔予不逮矧太史前告天將動威日有食之期在正月變異甚鉅殆不虛生夙夜以思未燭厥理將以彌綸初政消弭天雷非藥石之規孰開朕聽况今周行之內人有所懷獨堯之中言亦可採凡朕躬之闕失若左右之忠邪政令之否臧風俗之燬惡朝廷之德澤有

不下究閭閻之疾苦有不上聞咸聽直言母有忌諱朕方開謹正
之路消壅蔽之風其於鯁論嘉謀唯恐不聞聞而行之唯恐不及
其言可用朕則有賞言而失中朕不加罪朕言惟信非事空文尚
恐乃心毋悼後害應中外臣僚以至民庶各許實封言事在京於
合屬處投進在外許於所在州軍附遞以聞布告邇遐咸知朕意

賜夏國主詔

韓琦

昨以夏國累年以來數興兵甲侵犯疆陲驚擾人民誘迫熟戶去
秋乃復直叩大順圍迫城寨焚燒村落抗敵官軍邊奏屢聞人情
共憤羣臣皆謂夏國已違誓詔請行拒絕 先皇帝務存含怒且
詰端由庶觀逆順之情以決衆多之論逮此遼章之稟命已悲仙
馭之上賓朕纂極云初包荒在念你循先志俯諒乃誠既自省於
前辜復顧聖於求好苟奏封所叙忠信無渝則恩禮所加歲時如

舊安民保福不亦休哉

賜觀文殿學士禮部尚書王舉正不允詔

歐陽脩

夫朝廷之廣大賢雋之衆多必有儲然耆壽之臣以當上所優禮
之異或事思所訪則有老成俾時之式瞻以為人望故禮雖七十
猶有不得謝者焉卿懿文高行有君子之風清節令聞為當世所
重閱書秘殿日侍清閑進讀經筵坐論道德固非有官司之貴筋
力之勞宜思少安副我眷待

賜夏國主詔

歐陽脩

朕嗣守丕圖日新庶政方推大信以協萬邦思與藩屏之臣永遵
帶礪之約矧勤王而述職固奕世以推誠而近年以來將命之使
或不體朝廷之意罔循規矩之常多於臨時率爾改作既官司之

有守致事體以難從且下脩奉上之儀本期効順而君有錫臣之
寵所以隆恩豈宜一介於其間輒以多端而生事在國家之撫御
固郭爾以無疑想忠孝之傾輸亦豈欲其如此故特申於旨諭諒
深認於眷懷今後所遣使人之宜精擇不令妄舉以紊彝章所押
押賜押伴使臣等亦已嚴行戒勸苟有違越必真與刑載惟信誓
之文炳若丹青之著事皆可守言貴弗違毋開間隙之萌庶數修
久之好

賜南平王李德政曆日詔

宋 祁

頒曆之義以初為常俾一天下之歸用謹人時之授以卿列瓊南
齊率職本朝宣我恩化慰彼黎庶每屬歲元之會必榮廟朔之藏
朕亦推慶機祥裁輔舒慘申命太史分次左方宜案象以奉行表
布和之胥泪特茲馳錫勿怠欽承

賜判求興軍韓琦再乞相州不允詔 王 安石

卿當國家之多難任社稷之至憂實能忠勤以濟勲績方均逸豫
適此外虞煩我元功良非得已亦惟體國義不辭勞今雖尚謀經
武之時非有蒐兵伐罪之事坐臨諸帥固可優游何必舊邦乃能
休養勉綏居息以副倚毗

賜守司徒檢校太師兼侍中韓琦詔 王 安石

便道之鎮朝廷故常來朝京師朕意所欲使事曲折既當聞知忠
言嘉謨又所飢渴雖知勤勩可不勉哉

賜富弼乞判汝州允詔 王 安石

比飭使人具宣至意就令賜告冀遂寧寥卿嚴祗朕命不敢違息
顧念吏卒閱其久留觸熱載馳用忘勤勩恭以事上卿實有之仁
及賤微又能如此忠誠所惻豈獨朕心從容小邦姑以養福勉綏

吉祿毋恤後艱

賜知亳州歐陽脩乞致仕不允詔二道王 安石

股肱名臣與國同體禮當得謝朕尚難之况年非告老之時而勲在受遺之籍不留屏輔人謂斯何姑體至懷少安厥位

卿勲德之舊簡在帝心從容一州足以休養而抗奏至於四五必以田里為歸豈朕視遇故老有不足於卿乎何其求去之果也欲喻至意莫知所言惟能勉留實副勤佇

賜荅曾公亮詔 王 安石

青莪變異以戒人君推之股肱朕所不敢元勲舊德實賴交脩謹告之來必緣象類明諭朕志使當天心庶幾君臣並受遐福不務出此而果於辭權是惟保身豈曰謀國

賜特放知潭州燕度待罪詔 王 安石

卿受命方隅助宣德化姦兒弗率乃觸大誅引慝自歸謂當譴黜萬方有罪責在朕躬雖爾長民豈專任此

賜宰臣韓琦不赴文德殿立班待罪不允詔

王 珪

天子之御正朝久而未講宰相之班百辟後亦從隳檻臺簡之忽陳規邦彛之浸略蓋延英賜對每諭中吳之容故宣政留班不及大昕之謁矧在職之匪懈奚引愆而棄寧宜斥細嫌用綏素曠

賜河陽三城節度使兼侍中曾公亮乞免冊禮允詔 王 珪

天子臨軒拜三公其禮舊矣今朕以上公之秩加于元巨方戒有司卜日而冊授之乃援比固辭不能為朕引紱廷下吁其禮何時而可復邪雖用勉從則匪朕心之擇

賜判亳州富弼乞罷使相不允詔 王 珪

朕初臨丕基首撰大吏方勞精而共務忽引疾以屢辭去雖踰於
歲年念不舍於朝夕適覽奏函之疏又將使袞之還且重祿所以
賦一賢樂郡所以優舊德宜收曲慮終保高名

賜吳奎免恩命不允詔 王 珪

天子惟君萬邦建時百辟以祗迪于乃事矧曰左右之臣以朝夕
承久乃辟予政有弗欽爾克懋乃猷茲庸命爾圖厥政爾乃陳所
以固辭朕命者三朕思有虞之世羣臣皆讓亦莫安厥位終敕之
曰俞汝往哉爾弗逃聞于前人其率時訓惟厥中嗚呼慎爾止毋
倚乃身乃罔弗孚于休

戒諭夏國主詔 土 珪

維乃祖考克有西土世為漢藩輔令爾弗蹈于前烈迺竊署重爵

以奉幣於朝方邊吏拒還乃復稽留境上不及廷見之期泊朕親
臨貢函而僭我王命實如所聞朕疑風俗荒遠未達朝廷之儀雖
然棄信慢常誼不可長其務思先世之約以保綏于斯民毋忽是
圖以奸我有邦之罰今後所差使人即不得僭擬

賜宰臣韓琦請郡不允詔 呂 公著

夫忘身徇國者前志之所高送往事居者人臣之所勉顧惟寡昧
矧在亮陰求言負荷之艱實賴股肱之助荐按來奏頗異予聞謂
已事於山園必聽辭於機柄雖未代或爾在本朝則無唯天聖之
初馮拯去位非緣使頌而獲罷蓋以疾疢之匪任卿體力素強望
實兼劬所宜遺履謙之近節懋經國之遠圖深體至懷勉綏厥位

賜王廣淵張詵筵諭詔 元 絳

洮岷之役師旅載興維予信臣一廼忠力百爾調發並濟厥須告

凱奏功實繁伙助特加褒寵有朕分頒宜體眷懷益圖來効
賜新除落致仕依前光祿大夫范鎮赴闕詔

蘇軾

夫有德君子以精神折衝譬之麟鳳能服猛鷲朕虛懷前席以致
諸老非敢必以事諉也苟得黃髮之叟皤然在位則朝廷尊嚴與
冗消伏鄉雖篤老乃心王室母憚數舍之勞以副中外之望
賜尚書刑部侍郎范百禄乞外任不允詔

蘇軾

成王命君陳商民在辟予曰辟爾惟勿辟予曰宥爾惟勿宥惟厥
中古之有司與天子相可否蓋如此而况公卿之間議有異同而
不盡其說哉例在中書與在有司固宜審處歸于至當而鄉遂欲
以此去位非古之道也其益修厥官以稱朕意

公路賜奉安 神宗皇帝御容禮儀使呂大防銀合茶

藥詔

蘇軾

於赫 神考如日在天雖光明無所不臨而躔次必有所舍肆予
命爾祇奉此行禮既告成勤亦良至感慕之外嘉歎不忘

賜阿里骨詔

蘇軾

惟爾祖先世篤忠孝本與夏賊日尋干戈亦惟恃我朝廷爵秩之
隆用能保爾子孫黎民之衆肆朕命爾嗣長乃師而承襲以來強
酋外禮爾弗能禁恣其所為遂據洮城以犯王略陰連夏賊約日
盜邊朕愍屬羌之無辜出偏師而問罪元惡俘獲餘黨數亡山後
底平河南綏服朕惟率酋豪而裨疆場乃爾世功叛君父而從仇
讎豈其本意卿能改過未忍加兵果因物以貢誠願洗心而效順
爾既知悔朕復何求已指揮河路更不出兵及除已招納到部族

外住罷招納依舊許般次往來買賣及上京進奉爾宜約束種類
共保邊陲期寵祿於有終知大恩之難再勿使來疑復為虛言

賜正議大夫知鄧州蔡確乞量移弟碩允詔

蘇軾

以義責備春秋有矢教之譏以情內恕詩人有將母之念碩之得
罪事在有司難以遺近之親而廢朝廷之典及觀來請有槩予心
重違兄弟急難之詞以傷人君奉養之意

賜端明殿學士銀青光祿大夫致仕范鎮獎諭詔

蘇軾

朕惟春秋之後禮樂先亡秦漢以來詔武僅在散樂工於河海之
上往而不選聘先生於齊魯之間有莫能致魏晉以下曹鄴無譏
豈徒鄭衛之音已雜華戎之器間有作者猶存典刑然銖黍之一

差或宮商之易位惟我四朝之老獨知五降之非審聲知音以律
生尺覽詩書之來上閱籒籀之在廷君臣同觀父老太息方詔學
士大夫論其法工師有司者其聲上追先帝移風易俗之心下
慰老臣愛君憂國之志究觀所作嘉歎不忘

賜觀文殿大學士集禧觀使蘇頌乞致仕不允

范祖禹

祖宗以來貴德尚齒鼎槐之老莫不眷留班于大廷表儀百辟卿
向繇省轄進涖宰司深執勞謙懇求去位置使祠館勉徇雅懷已
退處於立園尚何殊於田里矧卿筋力克壯聰明不衰中外所瞻
足以重國體茲至意無或費辭

賜新除觀文殿大學士中太一宮使范純仁令赴闕供

職詔

曾肇

卿三朝元老四海具瞻出處為邦國之重輕用舍繫仁賢之消長
久置散地宜還本朝俾陟降於殿帷仍總司於琳館豈惟尊德尚
齒昭示寵優庶幾鯁論嘉謨日聞忠告昔周公已老猶在京師留
侯雖病不去漢室眷惟舊弼異世同心聞命疾馳副朕所望

大宋文鑑卷之三十一

大宋文鑑卷之三十二

勅類

頒貢舉條制勅

賜右屯衛大將軍叔韶獎諭勅

賜陝西路沿邊經畧招討都部署司勅

罷諸路同提點刑獄使臣置轉運判官勅

復天下州縣官職田勅

條制資蔭勅

皇族出官勅

赦文類

建隆登極赦文

歐陽脩

歐陽脩

宋 祁

劉 敞

張 方平

張 方平

蘇 頌

嘉祐明堂赦文

王珪

治平立皇太子赦文

王珪

熙寧七年南郊赦文

元絳

元豐立皇太子赦文

鄧潤甫

冊類

乾德上尊號冊文

范質

封祀玉牒文

尊皇太后冊文

歐陽脩

皇后冊文

王安石

仁宗皇帝加上徽號冊文

王珪

立夏國主冊文

王珪

皇后冊文

李清臣

仁宗皇帝哀冊文

韓琦

宣仁聖烈皇后哀冊文

辛仲游

欽聖憲肅皇后哀冊文

李清臣

勅

頒貢舉條制勅

歐陽脩

夫儒者通天地人之理而兼明古今治亂之源可謂博矣然學者不得騁其說而有司務先聲炳章句以牽拘之則吾豪雋奇偉之士何以奮焉有純明補茂之美而無敦學養成之法飭身勵節者使與不肖之人雜而並進則夫懿德敏行之賢何以見焉此士人之甚弊而學者自以為患議者屢以為言朕慎於改更此令詳酌仍詔宰府加之參定皆以謂本學校以教之然後可求其行實先策論則辨理者可盡其說簡程式則閑博者可見其材至於經術

之家稍增新制兼行舊式以勉中人其煩法細文一皆罷明其
賞罰俾各勸焉如此則待士之意周取人之道廣夫遇人以薄者
不可責其厚今朕建學興善以尊子大夫之行而更制革弊以盡
學者之材予於教育之方勤亦至矣有司其務嚴訓道精察舉以
稱朕意學者其思進德脩業以無失其時凡所科條可為永制

賜右屯衛大將軍叔韶獎諭勅

歐陽脩

朕固嘉汝嚮學勵善蔚然而有文與夫習富貴之驕而樂狗馬之
翫者異矣然夫學者所以知君臣父子之禮法可以施於國入可
以施於家汝其慎擇厥師講救其闕使言而無過以自遠於悔尤
夫能異於衆人誠為有立必至乎君子然後大成汝其勉之無或
中止

賜陝西西路沿邊經略招討都部署司勅

宋 祁

朕卹軍旅之苦寵邊陲之良事從優寬情無遴愛至於常愆細過
並許功除煩文苛法罕由吏議昨滕宗諒張亢並緣事任合給公
用庫錢俾其宴享賓僚犒餼軍伍而乃用度無藝簿領失防陽託
貿營潛有牟入攸司言上遣使即推如聞逮繫頗多鞠劾彌廣本
其冗費寧足深誅已罷柔窮悉令原貸其滕宗諒等止免一官量
降差遣雖屈吾法期慰士心且夫盡用市租美推趙將來從我取
誼表漢臣每慕前風大體尚慮諸道帥守便以茲事為懲或損狹
餼率或裁量藥餌苟存畏避謂免譏彈胡益至公亦非朕意但當
循經費之式去自潤之私取仰於官均惠於衆由茲底績夫何間
然安節且懷毋或疑憚

罷諸路同提點刑獄使臣置轉運判官勅

劉 啟

國家兼覆萬內疆理天下分州立邑十有八路惟吏之不平民之失職政之頗類獄之糾紛未能獨察也故設糾虔之司使奉欽恤之寄專屬朝來貳以武吏誠欲審疑察枉釋寃浹滯納民於不寃流化於無訟而武吏或起世家或由軍功文墨期會未必深究監司背項適增其繁夫非其習而望其效違其方而冀其功不亦難乎其罷諸路同提點刑獄使臣令樞密院勘會已及二年者即令赴闕未及二年者與就移合入差遣及於河北河東陝西緣邊兵馬多處相度添置路分都監以次補用庶幾人盡所表官不虛受夫轉運使之任所寄耳目治財賦集事功也江南東西荆湖南北廣南東西福建益梓利夔等十一路此其去京師遠者萬里近者數千里或跨帶山海崎嶇巖夷而皆一負主之處則無與參慮出

則無與侈力設有緩急之警調輸之煩機會一失民受其敝甚非豫慮先事之策其各增置轉運判官一員以三年為一任差第三任以上知州資序人候一任滿日與提點刑獄差遣初入知州及第二任通判資序人候滿兩任日與提點刑獄差遣若居部無狀隳職敗事亦重行其罰蓋士常患任之不當其材無以見長用之不久其任無以就功今朕別異文武使得自試選擢賢能使得次進吾於士大夫可謂無負矣其各竭方悉心勉成功名布告中外咸諭朕意

復天下州縣官職田勅

張 方平

昔在先帝詔復公田合王制班祿之差得聖人養賢之義載原深旨本自愛民此者搢紳之間屢陳利害之意以謂郡縣受地有無不齊銓審除負權利為侔辨競以之傷俗因緣至于害人故嘗

命官斷以定數誠足釐於淳弊然未安於予懷禮不云乎厚祿以
勸群臣則下之報禮重凡厥文武仕于朝廷雖庶素者惟士之常
而富貴者人之所欲其全寬大之體自有公平之制所宜給其所
未給均其所未均約為等差槩令增足使事父母者得以致其養
畜妻子者得以致其樂冠昏喪祭有所奉慶恤饋問有所施不辜
私室之憂必專公家之慮則六計可以弊群吏之治四方可以期
衆職之修儻自犯于有司亦何逭於彛憲上廣先朝之惠示不
敢渝下俾諸臣之言審茲自定惟爾中外體予所存

條制資廢勅

張

方平

周禮大司樂掌學政以六藝教郡國子漢制光祿勳典任籍以四
行察三署郎茲其官材本於世胄然當辨論必屬俊良令廢法之
町原古典刑之是憲惟因循之日久寔滋蔓而倖多敝生作法之

浮溫起推恩之過且賞延干世諒非及於陳宗官惟其人顧何取
乎髻稚暨階仕進之路復無誨育之科室不沃墉田不疆畝處不
裕立身之道出不閑從政之方略觀貴途良鮮舊族此則上因朝
廷法制之不立下自父兄訓義之不孚故俾宰司詳為定令使夫
冢嗣先錄以篤為後之體支子限年以明入官之重設考藝之格
激之向學立保行之條勉令率履前史不云爵祿者天下之砥石
人君所以礪世磨鈍茲實用焉庶乎位有稱職之才朝多濟世之
美非惟為國造士是乃為臣立家咨爾具僚知朕此指

皇族出官勅

蘇頌

自我祖宗御諱叙邦族大則疏封於爵土次則通籍於閭臺普
集京師參奉朝請然而世緒遠皇枝益蕃屬有親疎則恩有隆
殺才有賢否則祿有重輕今而一貫於周行是亦奚分於流別雖

睦鄰之道誠廣而德施之義未周故廷臣數言宰司繼請謂宜定
正限以等彝朕惟親戚之間經史有訓漢唐之世典故具存或以
九族辨尊卑或以五宗紀遠近或聽推恩而分子弟或許自試而
劾才能或宗子之賢得從科舉或諸王之女自主昏姻盡前世之
所行顧當今之未備况我朝制作動法先王豈宗室等衰反無定
者因俾群公之合議將為一代之通規載攬奏封具陳條目以謂
祖宗昭穆宜從世世之封王公子孫抑有親親之義若乃服屬之
既竭洎于才藝之並優在隨器以甄揚使當官而勉懋至於任子
之令通昏之儀凡曰有司之常一用外官之法余言既允朕意何
疑告於將來遂頒明命噫自義率祖既殊升降之文因時制宜斯
盡變通之利咨爾宗室之衆固多博識之倫奉承新書當禮朕意
赦文

建隆登極赦文

五運推移上帝於焉降命三靈改卜王者所以膺圖朕起自側微
備嘗艱苦當周邦革昧從二帝以祖征洎虞舜陟方翊嗣君而纂
位但罄一心而事上敢期百姓之與能屬以北虜侵疆邊民罹苦
朕長驅禁旅往殄胡塵鼓旗纒出於國門將校共推於天命迫迴
京闕欣戴眇躬幼主以曆數有歸尋行禪讓兆民不可以無主萬
機不可以曠時勉徇群心已登大寶昔湯武革命發大號以順人
唐漢開基因始封而建國宜國號大宋改周顯德七年為建隆元
年乘時撫運既叶於謳謠及物推恩宜周於華夏可大赦天下於
戲革故鼎新景命初隆於王室青災四赦鴻恩普洽於民心更賴
將相王公協謀同力共禪寡昧以致升平凡爾萬方咸知朕意

嘉祐明堂赦文

王珪

朕承三聖之基履四海之貴深惟持國之日久益念為君之道難
有臨聽之產庶以圖天下之佚無奉養之靡廢以資天下之豐統
兢萬務之維微勉前事之所戒倚以左右輔弼之正予取有弗
欽事于上下神祇之明予敢有弗肅屬九穀登富三辰昭華象來
梓海之祥塵絕玉關之警有邦之應於朕豈功恭念為大之子者
必修報本之徑為人之子者必懷追養之慕重循菲德屢緝曠文
頃按明堂之圖古如路寢之制載經斯室載度斯筵直大火之駢
芒染季秋之肅氣物無上帝之稱非躬祠不足昭虔虔聖維文考
之尊非嚴配不足盡孝於時備法物之駕服大冕之章格靈眈
於真庭欵清德於太宇遷祇宗祀之舉具飭純誠之將迺神光陸
離燭于薦鬯之夕喜氣休曩被于燎柴之時亶丕事之繼成敢蕃
鑿之專鄉宜孚廷渙以契天心可大赦天下於戲承神之昨既均

輝耀之微盪俗之瑕復若風霆之布蓋禮鉅則擇之博孝至則勸
以遐尚賴秉文之英經武之傑厲同寅於王室吐大治於邦圖共
荷無疆之休亦膺無窮之聞

治平立皇太子赦文

王珪

王者承天立極莫不思長世之圖為國建儲所以正萬邦之本故
朕親先父子而天下皆以為愛命發朝廷而天下不以為私粵予
上嗣之良稟自日躋之聖出而就傳寢窮學肆之聞入則承顏勤
至寢門之間比䟽榮於王社益修德於天枝顧荷丕基之艱猶虛
正體之貳矧漢文命嫡著於即祚之初年且夏后立子期以傳家
於萬世維群元之所後維大器之所承式符少海之祥宜踐東朝
之位肆顯冊之不發嘉會言之大同爰契歡心用覃曠澤可大赦
天下於戲文昭武穆夙詒燕後之謀震長離明本有承華之象蓋

義重學先者禮必亟舉慶施學上則惠必遐流咨爾庶方當體朕意

熙寧七年南郊大赦

元 絳

王者欽崇神天嚴奉宗祏就郊以饗所以詔天下之恭假廟而烝所以教天下之孝洪惟五聖之烈誕輯百王之文肆予冲人昭事上帝載念物無以稱維一誠可以展大報之儀祭不欲煩維三歲可以述窮行之典協會康年之順道迎至日之長是用朝薦殊廷裸將太室乃進登於陽時以哀於皇穹合祛予祗陟配文祖祝遂告絜贊儀尚純六樂變音舞奏而諸物至二精揚燎煙升而萬靈交方不事之獲成取蕃禧之專嚮宜專大號以資多邦可大赦天下於戲意盡精禋既秩宗祈之舉政施惠術豐昭慶宥之行維特黎元綏我德澤尚賴謨明四近总蓋群材儀圖新策勳相隆

平之運同底于洽永孚厥休

元豐立皇太子赦文

鄧 潤甫

父子一體也惟立長可以圖萬世之安國家大器也惟建儲可以繫四海之望位序蚤定而人莫不以為悅典禮亟崇而衆罔敢以爲私末惟上嗣之賢寔有妙齡之譽入而視瞻孝友見於夙成出而存書聰哲繇於自得粵紹休於正統猶虛位於東朝迺考蒼龜之占迺稽方冊之實載消吉日肇闢青宮周家先親不敢忘廟社之重夏后與子蓋以順天之心宜覃曠恩徧暨群品可大赦天下於戲離明震長絲帝緒於億年解吉渙亨灑天仁於萬物蓋禮之所行者大則澤之所流者深咨爾多方體朕至意

冊類

乾德上尊號冊文

范 質

維乾德元年歲次癸亥十一月己酉朔十六日甲子攝太尉守司徒兼侍中蕭國公臣質守司空平章事臣溥尚書右僕射平章事臣仁浦及内外文武臣寮馬步諸軍將校藩郡守臣四夷君長縉黃耆艾等七千五百人謹再拜稽首上言曰惟天為大惟堯則之又曰舜有天下無為而理是以古之言道德者莫先於二帝一則曰聰明文思一則曰溫恭灑哲英聲茂實意無欲而自彰景福鴻休心無求而自至巍巍蕩蕩無得而言伏惟 皇帝陛下高明博厚宜慈惠和純粹之德全孝友之行著惟精惟一知微知章向者龍尚處於潛淵日未離於暘谷歷試之際志在扶老險阻艱難何往不濟躍焉蹈高平之陣蹙戎佐淮甸之征喋血塵兵一月三捷勞旋欵至論功莫二洎乎天監厥德用集大命人祇叶應風雨咸若鼎運初建國步猶梗始則李筠犯順長戟指闕并入連禍寇我

北鄙於是行重進怙亂棄德崇姦幅員千里生民被毒於是有廣陵之役千乘萬騎如霆如雷詢彼仇方震疊區宇翠華宵至堅城旦下連乎二孽有同符契累朝已來出師誅暴未有若茲之奇速也頃者華風不競中國政微五嶺三江置諸度外殊文異軌六紀于茲肇啓聖謀驅攘寇亂荆湖底定南土晏然燕薊之戎汾晉之孽燕巢幕上朝不謀夕邊事少閒理道無壅嚴恭寅畏一日萬幾勤於已而泰於人儉於躬而豐於物明四目而高視達四聰而遠聽不侮鰥寡恤天窮也信及豚魚遂物性也惜力念耕耘之苦推食閔介冑之勞法家之流既峻且密乃詔大理重正刑名俾盡哀矜務從寬簡減盜竊之罪緩鹽麩之禁好生之德通於神明若乃昧爽丕顯坐而待旦商湯之戒慎也側身損已長轡遠馭漢文之化導也循名責實信賞必罰建武之法制也果敢決斷

從善如流貞觀之風烈也帝王之道於茲備矣太平之業於茲成矣於是祇見清廟致其壽享圓丘展禮對越上玄一獻而天帝降祉再獻而神人以和三獻而萬祿攸報祥風拂袂休氣繞壇熙熙怡怡群心胥悅國家大慶衆庶共之肆赦覃恩俾民更始與天合道謂之應天大無不覆謂之廣遠無不至謂之運博施濟衆謂之仁智周萬物謂之聖化成天下謂之文保大定功謂之武其德無際謂之至德臣等不勝大願謹奉玉冊玉寶上尊號曰應天廣運仁聖文武至德皇帝伏惟垂日月之明監億兆之情凝旒端委昭受鴻名如山嶽之固如松栢之貞乾健不息品物咸亨承天之祐萬壽千齡

封祀玉牒文

維大中祥符元年歲次戊申十月戊子朔二十四日辛亥有宋嗣

天子臣敢昭告于 昊天上帝啓運大同惟宋受命 太祖開階功成治定 太宗膺圖重熙累盛粵以冲人丕承列聖寅恭奉天憂勞聽政一紀于茲四隅來暨玄貺殊尤禎符章示儲慶發祥清淨可致時和年豐群生成遂爰荷顧懷敢忘繼志僉議大封聿伸昭事躬陟喬嶽對越上玄率禮祇肅備物吉蠲以仁守泣以孝奉先祈福逮下侑神昭德惠綏黎元懋建皇極天祿無疆靈休允迪萬乘其昌永保純錫

尊皇太后冊文

歐陽 脩

維治平二年歲次乙巳十一月丁巳朔十有六月壬申嗣皇帝臣英宗謹稽首再拜言曰臣聞昔者明王之以孝治天下者非家至而日見也蓋有要道焉推所以行於已者為天下率盡所以奉其親者為天下先而四海靡然而承風矣洪惟 有宋受命造邦百

年四聖而小子獲承之以繼我 仁考之遺休餘烈方與群公卿
士夙夜以思勉其不逮庶幾如我 仁考付界之意以申罔極欲
報之心此固慄慄祇懼不敢違寧者也顧惟眇末之質提攜鞠育
慈仁淋漓至于有成自我 聖母嗣位之始哀迷在疚而憂勤艱
難一日萬務協和綏靖保祐扶持功施邦家亦惟我 聖母求惟
至恩大德無物可稱是以稽參典禮率籲群心合志一辭懇懇倦
倦不勝大願謹遣攝太尉具官韓琦司徒則官胡宿奉玉冊金寶
上尊號曰皇太后恭惟 皇太后聖善明哲柔閑靜專粵自正位
中宮內助 先帝陰禮修而教行儉德著而下化遂及萬國先於
正家逮夫玉几受遺遭時多難勉狗勤請權同聽決而明識遠慮
勤懷謙畏深鑒漢家母后之失訖不踐於外朝及歸政冲入合於
易之進退不失其正之聖是惟全節鉅美固已超出前古而垂法

後世宜乎盛烈播乎聲詩尊名光於典冊惟末小子獲奉温清嗚
呼殫九州之富以為養未足盡於孝心享萬壽之福而無疆期永
承於慈訓臣誠懼誠抃稽首再拜謹言

皇后冊文

王 安石

維熙寧二年歲次己酉四月丁酉朔二十六日壬戌 皇帝若曰
自昔有天下必擇建厥配以承宗廟以御家邦肆朕受命奉循前
烈考慎典冊以祈協于神民咨爾向氏懿柔淑恭舊有顯聞肇功
唯祖弼亮帝室流德之澤覃延後嗣是產碩媛比賢姜任越朕初
載來嬪番邸盟饋在中率禮無違以至嗣服祇承內事齋明夙夜
罔有曠失宜崇位號表正宮庭令遣攝太尉推忠協謀同德佐理
功臣樞密使光祿大夫檢校太傅行尚書刑部侍郎上柱國東平
郡開國公食邑五千戶食實封一千戶呂公弼攝司徒朝散大夫

右諫議大夫叅知政事護車太原郡開國公侯食邑一千一百戶
賜紫金魚袋王珪持節冊命爾為皇后夫惟興釐厥士女咸自內
始達于四海朕克勤人用弗怠朕克儉人用弗奢朕克正人用無
敢側頗辟爾勤相朕乃濟登茲於戲匪初惟艱惟慎厥終爾忱念
茲朕以求享天祿爾亦豫有無疆之福豈不臧哉

仁宗皇帝加上徽號冊文

王珪

維元豐六年歲次癸亥十一月壬寅朔二日癸卯孝孫嗣皇帝臣
謹再拜稽首言曰臣伏觀古先格王莫不大名發於前而大惠昭
於後其法皆本於至公而不可易至後世臣子又欲盡報上之道
以謂君德其盛其言不足以包衆美於是至郊加誅之文夫欲
推事存之禮述追遠之志則奉素享之榮號益新紀之鴻烈謀群
公請太室洋洋寧際天接地而震顯之不亦當靈心而傳古誼乎

秦惟 仁宗神文聖武明孝皇帝躬清明之資賦神睿之略乾行
施之不息仁性根於自然時乘六飛端御大器知窮八荒而不見
其迹澤及萬彙而不居其功爾乃簡拔峻賢放遠邪佞宥恕刑獄
懷保鰥寡賞不徇所私罰必當于理興農桑之本務緝禮樂之墜
文有慘怛好生之心吏或誤入重辟必終身見斥有寬裕從諫之
度言者屢進狂直必曲意見容念兵革之傷夷則不款而服念稼
穡之勤勞則罔寧于勉矧履天下之尊而持之以抑畏饗天下之
富而寶之以儉素輿馬不聞於游盤鍾鼓不涉於間燕宮室亡奢
靡之飾器服亡瓌奇之玩加以夙夜齊肅事天之誠盡霜露休惕
念親之感深方朝廷之久安迺大革因循而聖政又新為杜稷之
重計迺前定禍亂而皇嗣蚤立故四十二年仁恩川流溷濡熏蒸
格于上下日月華風雨均四時餘百穀蕃北有獷狽而不能驕西

有黠羌而不能軼蟲魚遂性自安川藪之游男女潔誠更趨耕織之樂固有幽遐荒昧之俗不約而子來奇偉倜儻之瑞不劫而特見者矣丕赫哉憲度鴻明聲文沛施自載籍之傳蓋未有休功盛業可加于茲也重循涼菲永念猷訓今將款清廟陟紫壇遂受厚福以浸黎元置於此時臨彤庭發玉版上不敢墮 祖宗之典下不敢虧神民之情如堯如舜如禹如湯豈不高一世之聞而流萬世之聲哉爰飭上儀載揚景鑠謹遣銀青光祿大夫守尚書左僕射兼門下侍郎上柱國太原郡開國公食邑七千六百戶食實封二千五百戶王珪奉玉冊玉寶加上徽號曰仁宗體天法道極功全德神文聖武濬哲明孝皇帝恭惟明德在天臨受徽稱維億萬年永錫嘉祉謹言

立夏國主冊文

王珪

維熙寧二年歲次己酉三月戊辰朔十四日辛巳皇帝若曰於戲昔堯合萬邦而民風和周建列土而王業楙若古申命蓋國家之成法也咨爾秉常迪性純一飲躬靖處生稟山川之靈舊傳弓鉞之賜撫有西夏尊于本朝知事君必盡其節知守國當保其衆乃內發誠素外孚誓言質之天地而不欺要之日月而不昧朕用稽酌故典表顯徽實錫爾以茅土之封不為不寵加爾以車服之數不為不榮消辰既良備物既渥誕舉丕冊以華一方今遣朝奉郎守尚書司封郎中上輕車都尉賜紫金魚袋劉航文思副使銀青光祿大夫檢校太子賓客兼御史大夫騎都尉彭城縣開國伯食邑七百度劉忬持節冊命爾為夏國主為宋藩輔夫履謙順者靡不膺長福懷驕肆者靡不蹈後虞率身和民時乃之績往欽哉祗予一人之彛訓可不慎歟

皇后冊文

李 清臣

皇帝若曰天相予 祖宗茲歷世寧康朕既敬紹丕緒罔作麗觀
底信內外惟式斬以正邦今左右弼臣德儀正貳暨族老宗婦各
虔厥事成鋪繹舊聞明敷于位曰乾施坤承日照月儷四時 不
忒萬物用成盍稽則象詢考卜筮若時元吉正名錫服俾長者六
宮以母天下予惟國有故常是何敢弗率咨爾王氏乃祖忠勞王
家書于太史子孫公侯出入藩服惟功澤逮茲是碩媛淑嫕溫恭
備有嘉德聘歸王邸入承事皇姑縻不若禮上天右序予家蚤育
元子慶在宗廟惠賚于四方乃以某年某月某日遣攝太尉具官
某攝司徒具官某賜爾皇后之寶方寸有半文螭紐授之玉冊
厥簡五十命爾翟衣弁纒博鬢黼領大帶以朝暨歲時將祀于東
西宮金輿朱蓋武賁禁衛步障行導是惟顯哉爾其克后職思后

道履中體順茲日饗多福集大祐于厥躬其尚伙助予治昭聞于
無窮於戲懋戒之哉

仁宗皇帝哀冊文

韓 琦

維嘉祐八年歲次癸卯三月癸卯朔二十九日辛未 仁宗神文
聖武明孝皇帝崩于福寧殿旋殯于殿之西階粵十月戊辰朔六
日癸酉遷座于永昭陵禮也龍馭賓天珠襦留殯萬方之軌同臻
七月之期茲近法仗已嚴靈輅未進風雲慘鬱以生悲臣妾涕號
而思殉孝子嗣皇帝臣英宗廟諱接統承堯念親晞舜徘徊象物驚禁
從以如存摧慕僊游致哀誠兮必盡繫臨奠以長辭蓋終天之永
恨乃命弼臣以文傳信其詞曰惟 宋受命與天無疆 藝祖以
武底寧四方 神宗以文萬邦一王真廟紹隆赫然其光逮夫
仁宗益熾而昌厥生之初上帝惟祐天日之表振古未覩色出圭

璋步嚴龍虎其俾真人來綏下土示良之建七鬯是主寢門之問
惕若文武嗣訓之循纂承丕緒左右獻言以象自處大運歸乾獨
化陶甄造良黜姦始章聖權其仁如天其度如淵其仁伊何得之
自然草秀而茁蟲飛而翔尚不忍傷況吾民焉惠澤之霑滂洋幅
負物無不滋四十二年猗如天兮化功則全其度伊何汪然莫際
巨細必容默分誠偽臣在言職不知諱忌時肆詆訐衆嫉狂易聖
心怡然曰此忠義是也吾從過焉何慮猗如淵兮是能致治明慎
庶獄極于哀矜惟法所在未嘗妄刑郡邑之吏責之詳平一失入
罪無階顯榮尊為天子以儉為貴崇尚清虛屏斥紛麗向緣不擇
輔臣入視殿帷蕭然茵食故敝率用繒素了無文綺衆曰驚嗟
上曰何謂吾之受用素止如是此民膏血烏敢妄費恭事天地孝
承祖宗九見圓丘再祗合宮大裕于廟親藉于東服器精備案盛

豐小次不御秉圭顛顛何必戶曉民胥偃風取士之路務存至
公十二臨軒策之必躬雋髦盡得巖穴幾空有將有相曰功曰庸
眇視三代吾其北崇北胡之強西夏之獯時欲耽梁恣其貪嗜吾
以威懷折其凶銳兩皆搖尾從我羈解百蠻梯航琛賫日至禮樂
具修干戈不試夫惟立嗣天下之基前世令王或牽以私事不前
定濱于亂危其出獨斷挺然不疑求賢于宗唯聖是知神器之重
其傳有歸湖社以安生靈以嬉迹其大公堯舜之為昔在人上必
有偏好或興馳逐或喜征討或務宴游或專營造或適聲色或泥
汙寵基奔之工擊拂之妙有一于此不從而效噫吾 仁宗澹無
所樂曰吾好者在勤政道日必盱吳惟先之紹閒時弄翰或隸或
草聖帚之揮千奇萬巧云冬之暮清燕之間再闕天閣詔呼從宦
親作飛白侍臣縱觀心合造化生成筆端書幅踰百大均寵頒返

坐群王行觴盡歡嗚呼哀哉賜墨尚濕宸章未利植璧斯虔遽有
金縢之禱綴衣遂徹俄承玉几之言嗚呼哀哉大變之來天傾地
裂四海之動風號雨血兆民震駭其無生百辟寃乎而僅絕乘雲
之游兮汗漫而自高持顙之慕兮僵仆而徒切因疑前會之非常
以與群臣之叙訣嗚呼哀哉候律云凜詎辰協元嚴蚤路以方駕
視羽幢兮始前池竹搖雉車旗飾鸞背朱雀之通達指青龍之古
山關路長兮去復去官車晚兮還不還痛徹六宮兮莫如逝淚灑
重瞳兮胡可攀嗚呼哀哉寒日晝昏愁陰夜積卷晴霓於丹旆蕩
霜波於素帟悲結互咽六州之奏憎悽駿嶽前瞻萬歲之聲何聞
大隧一高幽堂永寂人間之恨空長帝所之歡豈極嗚呼哀哉秦
漢而下御邦于氏夔越三絕纔聞數君其間治亂以相駁否身之
不爾加 仁宗享國之久而始終太平兮彼安敢望吾之清壘生

而無窮者厚載健而不息者高旻惟至仁盛德與高厚之俱兮萬
世巍然而不泯嗚呼哀哉

宣仁聖烈皇后哀冊文 代宰相

畢仲滂

維大宋元祐八年歲次壬申九月三日癸酉大行皇太后崩于壽
康殿旋殯于崇政殿之西階粵明年正月遷祔座于永厚陵禮也
叢殿帟空袒庭燎掩雲似卻而復疑月雖輝而如慘 孝孫嗣皇
帝臣哲宗臨遣奠以興哀瞻振容而永慕鳳吟管以何悲龍挾輔
而若駐羽衛羅闕神儀布露爰制近司紀陳聖度其詞曰 皇矣
大宋寶命自天重明累聖跨成軼宣正后在中契于坤乾較任此
妙亦逾于前有系目菱原深積厚功熙我朝方虎是偶奄韓宅魯
益曰厥後月瑞日符是與太母於鑠 太母躬義率仁居靜猶地
含和如春正素自稟聰明夙聞作合 英祖齊昇並罹受養 神

考陰功善教體道不違惟德是做元豐未命帝命惟辟聽斷勉同
以補天隙擁佑神孫立民之極恭以勵人儉惟化俗衣有大練奩
無片玉房闈不出四海在目信義由中九夷思服如鑑不塵如璞
不緇三事大夫正直是咨宗藩外戚滲漉惠慈人壽王官雖卑不
私廟謁齋行外朝齋踐池籩齋臨惟正是勉服御靡更惟惡是善
庸爾萬方為則為典左右皇躬動有壇宇君由範防造次于是寢
隆且昌如天清明霽日之光治化方成憂勞亦至外若平居中階
邁厲坤軸軋以夜摧月輪翻而曉墜守大化之靡但尚斯民之為
意嗚呼哀哉珠箔低垂兮雲霧猶隔蕙帳髣髴兮爐煙未銷想仙
馭以何道謝人寰而已迺萬乘現勤哀纏九霄千官縞素兩泣東
朝嗚呼哀哉人與神兮變何速秋復春兮時以徂犧樽盈兮未忘
於平昔池綉動兮難留於頃臯翼八翼以為衛陳六衣而祀塗鳴

呼哀哉野蒼茫兮人漸遠伏徘徊兮天欲晚遡洛澗兮嗟備物之
如在逾鞏岸兮知神遊之不返山川已兆於真宅松栢猶疑於故
苑嗚呼哀哉王晦龍蟄金藏鑑昏泉關掩夜官闈泣晨車軌同兮
雖來於萬國寶座閉兮惟朝於百神魚惟炬以非日鴈長飛而不
春嗚呼哀哉成內則於三朝貽素風於十祀致理之勤兮今已往
大道之公兮古如此何遠其家以為國而憂其民之猶子宜大書
而作冊俾永光於 宋史嗚呼哀哉

欽聖憲肅皇后哀冊文

李 清臣

粵建中靖國元年辛巳歲正月壬戌朔十三日甲戌 大行皇太
后崩于慈德殿二月壬辰朔十一日壬寅殯于西階以三月壬戌
朔八日巳巳戒百官請命於太廟謚曰 欽聖憲肅皇后太史丞
之將以五月辛酉朔六日丙寅遷座于永裕陵禮也哀子嗣皇帝

臣徽宗朝極永感之懷無窮之慕躬薦洞酌奉寧輔馭痛三牲之
養忽至於遣莫悲萬壽之祝俄成於晞露整咳如在聲容不返畢
銅史之餘滴動金商之清挽暑令忽其成凄薰風颯其變慘像設
既嚴物儀具有惟是冊書用傳不朽官臣承詔式虔事守紀斬寓
哀貽之永久其詞曰 我宋隆康恩漸動植遠惟暨邇生成滋息
趨走賢智修官懋職遐及四裔左袵重譯維相向公梁棟宗祏逮
女曾孫迨家瑞國蚤歸王藩旋被揄程至牲溫溫令儀翼翼道意
禮學生知自得慶壽寶慈問安所夕執養寒暑端莊不易內輔一
神宗贊助陪益凡厥見聞舒徐啓迪十有九年晏燦披披萬邦託
慈六宮仰式約省外氏湯沐脂澤斯世丕平陰與多績比懿夏商
塗山簡狄姜嫄太妙聯袂並賜元符三祀歲執徐直正月己卯變
司割若薤薤 哲宗武威文德夫何弗祐忽違窀穸上嗣考爾將

失大業于時弼臣或藏邪慝輒進異論欲倒白黑賴我 聖母沉
潛剛克拚之陛前氣殫語塞庭羅犀渠門也關戰德見利入寰宇
慶懌一指顧間長寧社稷譬如過皇神工妙力鍊石補天斷鼉立
極冲融宇宙泥濘淥滌賢不登察寃不釋臣嘗侍對與聞訓教
曰我 皇帝聖材天錫子道勤於政事祗惕治本亂原講啓紬繹
惠心溥溥物理研覈 帝堪多難于復明辟何俟附饗始還禁闕
幸濟初艱後罔餘責重下教告亟就安適 帝拔以留懇欵裝積
數請弗回推璽卻籍義盡今茲事高往昔在漢馬鄧固多勲色其
於邦民憂不離臆動履仁儉示先壹則服無珠幾器無瑤碧警戒
彫繪棄捐組織言祖經墳智該儒墨諸書過眼疑微洞析統統瞿
瞿殆忘寢食涼暄密移於氣侵蝕 皇帝聖孝啓處在側藥審刀
圭術窮鉞石檜攘山川猶期千億冊劑雖靈宴筭終厄佛供晝昏

夜氛夜赤復象告凶軒星示城數地坤元景淪望鬼五十八載馳
光度際嗚呼哀哉梓匠奏工嬪娥罷飾帳慢光途嬪堂撤席縞士
鼎鼎絳旌奔奔左背城闕右徑阡陌鼓騎趨趨綈車咿噫簫笳悲
吟鹵簿嗷赫萬類奪輝四民聚戚御服直麻皇情藥棘嗚呼哀哉
霽雨故宮莓苔舊城鳳魄蕭森獸扉虛寂輦路鑑奩孰非陳迹引
望山園涕滯竹柏惟有微音長笛寶冊嗚呼哀哉

大宋文鑑卷之三十二

大宋文鑑卷之三十三
御札類

大慶祥 謝御札

熙寧元年南郊御札

熙寧四年大饗明堂御札

批荅類

賜除宰臣文彥博讓息命批荅

賜新除宰臣富弼讓恩命不允批荅

賜宰臣富弼乞退不允批荅

再賜宰臣富弼乞退不允批荅

賜宰臣富弼乞解機務不允批荅

賜宰臣文彥博乞解重任不允批荅

歐陽脩

王珪

元絳

歐陽脩

歐陽脩

歐陽脩

歐陽脩

歐陽脩

歐陽脩

賜樞密使宋庠讓恩命不允批荅

歐陽脩

賜杜衍讓恩命不允批荅

宋祁

賜賈昌朝讓恩命不允批荅

宋祁

再賜杜衍讓恩命不允批荅

宋祁

賜陳執中韓琦讓恩命不允批荅

宋祁

賜皇弟允迪讓恩命不允批荅

宋祁

賜皇長子淮陽郡王免恩命不允批荅

王珪

賜皇伯祖承亮改封秦國公免恩命不允批荅

王珪

賜宰臣韓琦已下乞立壽聖節宜允批荅

王珪

賜宰臣韓琦已下尊號不允批荅

王珪

賜韓琦免恩不允批荅

王珪

賜宰臣曾公亮免恩命不允批荅

王珪

賜韓琦免明堂恩命不允批荅

王珪

賜郝質免恩命不允批荅

王珪

賜宰臣富弼乞退不允批荅

王珪

賜歐陽脩乞退不允批荅

王珪

賜宰臣韓絳免恩命不允批荅

元絳

賜宰臣韓絳已下上尊號不允批荅

元絳

賜皇伯宗諤免恩命不允批荅

元絳

賜陳升之免恩命不允批荅

元絳

賜宰臣王安石已下乞御正殿復常膳不允批荅

元絳

賜劉摯辭免恩命不允批荅

蘇軾

賜太師文彥博乞致仕不允批荅

蘇軾

再賜太師文彥博乞致仕不允批荅

蘇軾

賜宰臣呂公著乞外任不允批荅

蘇軾

賜宰臣呂公著乞致仕不允批荅

蘇軾

賜右僕射范純仁免恩命不允批荅

蘇軾

賜門下侍郎孫同乞致仕不許批荅

蘇軾

賜劉昌祚免恩命不許批荅

蘇軾

御札

大慶殿恭謝御札

歐陽脩

勅内外文武臣寮等執珪璧以事神嚴祖宗而配帝雖有國之常典亦因時而制宜朕承三聖之丕基撫萬邦之有衆儉于已使天

下之民豐勞于心致天下之民佚罔敢怠忽庶幾治平而首春以來偶爽調適賴三靈敷祐百福來臻順以節宣獲茲康裕加以邊隅不聳風雨以時雖庶物之咸和顧眇躬而僧惕是用稽先朝之成憲詢故實於有司即廣殿之翼嚴擇靈辰之良吉式伸昭謝以格純休宜示先期俾茲誕告朕取今年九月內於大慶殿行恭謝之禮其今年冬至親祀南郊即宜權罷所有合行諸般恩賞並特就恭謝禮畢一依南郊例施行至日朕親御宣德門宣制仍令所司詳定儀注以聞務遵典禮勿俾煩勞咨爾多方咸體予意故茲札示想宜知悉

熙寧元年南郊御札

王 珪

有天下者莫重上神之報為人子者莫嚴宗廟之承率躬三歲之祠常候一陽之應緬慕先聖光施冲人載循禋類之期適在諒陰

之際大懼不能備飭儀物奉將染盛於是刺六經之文傳博士之
議皆以謂喪有以權而順變祭無以卑而廢尊矧稽參西漢之彝
公用景德之制顧予涼菲賴帝况臨遂卜天王之辰往脩郊見之
禮方且進祈茂祉以大庇黎元昭格至精以終圖熙事庶幾能饗
其敢憚勤朕以今年十一月十八日有事于南郊咨爾攸司各揚
厥職諸道府不得以進奉為名輒行科率其百司除事神之物
並宜一切仍舊外餘應于供奉所須務令淳約以稱朕不忘孝思
之義

熙寧四年大饗明堂御札

元 絳

勅内外文武臣寮等朕荷二儀之休履四海之富經英政之至治
秩將禮之彌文欽惟五聖之謨常躬三載之祀自續隆於大業已
肆類於圓丘與言總章未詔嘉饗維 仁祖之武宜謹於遵修維

文考之尊宜嚴於陟配况萬寶時楹三光仰澄官師協恭方夏底
定是用稽仍路寢之制消選肅霜之辰上以哀對天明辰昭事之
重下以教厲民志示追養之勤特戒先朝以孚大號朕取今年季
秋擇日有事于明堂其今年冬至更不行南郊之禮所有合行諸
般恩賞並特就祀明堂禮畢一依南郊例施行至日朕親御宣德
門宣制咨爾攸司各揚厥職諸道府不得以進奉為名輒行科
率務循典故無致煩勞

批荅

賜除宰臣文彦博讓恩命批荅

歐陽 脩

省表具之朕躬儉約以先人而生民未足憂勤以勵政而百職多
墮豈布德之不明抑任人之弗至是以齋居正慮先志後占鑒屢
易以為煩念難知之可慎永惟商周之所記至以慶卜而求賢孰

若用摺紳之公言從中外之人望鄉以舊哲比嘗相予惟字量能
寬以服人惟純誠故久而益信勲德兼著可以重朝廷忠信不回
可以臨大事夫謀於其始而既審則果於必用而不疑改其欽哉
朕命無易所讓宜不允仍斷來章

賜新除宰臣富弼讓恩命不允批荅 歐陽脩

卿有憂國愛君之 而忠以忘其已有經邦濟時之學而用未究
其能夫 久而積厚則施之不窮慮深而計熟則謀無不獲茲朕
所以虛心仄席有望於卿也矧卿正直不回庸邪素忌小人所異
君子所同是以前十年而左右之譽不及履躬一德而摺紳之
望愈隆朕內決於心外詢于衆敢謂有得卿其何辭

賜宰臣富弼乞退不允批荅 歐陽脩

朕眷惟宰輔之司實繫朝廷之重職或非稱勢因易搖比以連年

厭於曩易戒用人之不審致厥位之靡安故於圖任之初尤極精
求之意而議者謂卿有天下之譽慶朕得非常之才豈惟斷不惑
於予心固以慰久鬱之人望則朕之用卿者至矣卿之自待者如
何而方以嘉猷遽形退讓駭無因而及此曾莫諭於乃誠豈廊廟
之崇賈重者其憂難任而富貴之至位高則其慮易危邪朕嘗歷
考往昔之人其於進退之際過計而圖全者未必無患忘身而徇
國者固多今名惟爾之明必知所擇宜少安於職崇用深體於倚
毗

再賜宰臣富弼乞退不允批荅 歐陽脩

夫知人之明可謂難矣而任賢之術茲豈易哉若乃聽之不聰信
之不篤施設之方未盡弗極其材遲速之効有時莫能少待則彼
其任者賢亦艱歟卿以純一忠亮之誠蘊宏深遠大之業朕虛已

以聽推心仰成至於一二之臣是惟同德下逮衆多之論曾靡間
然方將甄叙賢愚修明法度務究本根而更治不逮歲月之逝功
期於有成茲乃予意奈何中道而將止夫亦奚託以為辭矧上下
既交寧有不通之志而君臣相遇豈為易得之時當體余懷勉安
厥位

賜宰臣富弼乞解機務不允批荅

歐陽 脩

夫宰相之事非可以歲月考而一二數也其在朝廷選賢任能而
各得其職下俾民俗遷善遠罪而不知其然至於法度修紀綱正
然後相與誠守而安行之以臻于治此朕所以虚心一意日有望
於卿者也今事有緒而卿辭焉豈朕德之不明將顧時之不可中
道而止夫何謂哉俾予獲用材不盡之譏而卿涉苟安自便之計
予所不取卿其勉焉

賜宰臣文彥博乞解重任不允批荅

歐陽 脩

夫知其人之為賢任則勿貳事其君而有道去不可輕此古之臣
主之明舉措必慎所以收功於一時而垂法於後世也卿夙有時
望為予柄臣自復秉於國鈞僅三周於歲序若乃進退賢否誅賞
罪功每於聽納之間敢忘虛已顧彼搢紳之論曾厭異辭方期有
成以副予意而乃過形謙損思避台衡豈寡德弗明於用才而不
盡將多言害正致厥位之難安苟異於斯夫何引讓矧卿忠信之
節足以叶予之一心材謀之優可以斷予之大事茲所東注寧煩
論言

賜樞密使宋庠讓恩命不允批荅

歐陽 脩

朕以因時致享克展於孝思已 受釐大均於慶澤乃眷耆明之
哲實予體貌之臣肅臨事之有容既交神而蒙貺宜推異數以示

眷懷雖嘉好謙曷止成命

賜杜衍讓恩命不允批荅

宋 祁

比虛右弼以須峻望卿清約忠壯華皓一節出入諷議靡事不為
挺然公實見於有政朕志先定成命惟行況萬幾繁可百職脩理
朕所倚辦卿宜知之遽聞讓函猥徇謙榮且誕告群方不容巔辭
久曠台路便發為遜欽服寵章

賜賈昌朝讓恩命不允批荅

宋 祁

卿曩侍經筵已知國器歷守京邑則風績早樹進領邦憲則威名
流聞陽休山立自處中道朕以為履正識敏材任輔佐引與機政
參貳台司曾是踰年休有成效觀得則懿俾課則臧斷自予志冠
升樞省誕告百執初無異言猥露奏封深存為遜況訓諭已熟與
命難淹速即欽膺以光朝舉

再賜杜衍讓恩命不允批荅

宋 祁

尚以戎醜尚桀師伍留屯公私之匱不可貲省又官濫於外吏欺
於中苛察過當孚競成俗濟水無益治絲愈焚圖所振整未知厥
序以卿久在樞禁習總事經年著識茂墨悴事國是用選自予志
對秉台衡藉敏材以康調發之難褻介節以懲進取之弊朕既寡
德方茲仰成尺奏荐聞能讓猶固已嘗批喻宜體眷求毋煩費詞
早膺寵典

賜陳執中韓琦讓恩命不允批荅

宋 祁

朕比執珪幣祗事神祇至誠所向鴻鑿如荅是以推衍天祚沛流
茂恩徧錄侍祠之勞悉從進律之典卿卓有成效協於僉言而臨
祭引讓稽恩未拜閱露章而既執非公論之所期便可欽膺即廢
謙執

賜皇弟允迪讓恩命不允批荅 宋 祁

朕敦睦懿親差次寵典年長者崇爵屬近者尚恩眷爾忘賢用加節制公言期協朝海既頒何執常謙欲遂素守道風雖亮允令難稽往哉惟諧母或煩請

賜皇長子淮陽郡王免恩命不允批荅

王 珪

昔我祖宗誕受天命厥惟艱哉克正皇猷丕懋乃績以遺我子孫無疆之休今朕纂厥服惟稽古建爾元子于有邦乃季秋辛亥群公庶尹用不祇朕言于廷爾乃陳德弗及期昇于一二弟兄之賢我聞曰立愛惟親立敬惟長其敢示天下以私虐汝惟往哉尚迪時命無違

賜皇伯祖承亮改封秦國公免恩命不允批荅

王 珪

夫戚藩之建王室是毗古者皆世襲其封近代或別予之邑既非祖烈之服又失廟祠之傳故朕推近屬之長賢脩先王之舊履以大子孫不絕之序以均宗社無窮之休適檻露章過形冲節宜體親親之意庸光繼繼之圖

賜宰臣韓琦已下乞立壽聖節宜允批荅

王 珪

赤制告圖肇承題序青煒動陸俯協誕期卿等過稽舊章列上芳牘緣華封之素祝建壽聖之嘉名竊惟受天元符撫國休運百辟稱觴而在帝四夷奉幣而在廷敢以菲懷抑于輿望

賜宰臣韓琦已下尊號不允批荅 王 珪

朕獲承大統三載于茲蒙天之休海內清靜方將飭齊輅潔純犧

以祗見天地宗廟之靈乃敢昭發丕冊揚徽垂鴻以自施寧尊榮者哉不圖執事之臣列上表功之號且臨政之日淺未有盛烈之章況事神之意恭豈在彌文之飾適增于媿難徇所陳

賜宰臣韓琦免恩命不允批荅

王珪

夫王者壹天下之俗宰相遂萬物之宜故君臣同德而教化成朝廷上賢則分職治肆朕承邦之乂得卿共政之均且國用失浮規節財力之匪易吏塗過冗甄序名品之為難歷勤勞之百為蹈夷險之一致向屬家卿之缺適登台席之元稽十神謀乎言朝聽維百辟之是式維兆民之是瞻奚與曲讓之辭殊匪大公之舉儼然衆志鬱于予聞蓋德盛而位隆者望雖與歸然仕剝而責至則事當隨決思體騰毗之具祈收撫固之情往哉代天工毋留邦渙

賜宰臣曾公亮免恩命不允批荅

王珪

夫天文中階之象色正則二氣鈞國柄三事之司體公則萬化緝朕何嘗不寤寐邦傑彌綸政機以敦美風俗之源以甄序官師之品所繫甚大維材之難卿行足以厲朝謀足以經國代言二禁而辨令鼓孳群動賦政中畿而神明炤于宿發頃陪議於宰臣旋冠謨於宥省邦之維度廢不舉兵之紀律廢不張屬上公之進賢宜右弼之膺寵忽起舜庭之讓未施鄴國之規群情鬱然予心勞止矧夫付安危之幾則望豈云淺當名器之分則處之勿疑所期廣猷慮以同寅會精神而輔力當抑謙風之固往調大化之元豈朕之獨致太平亦卿之與有令聞

賜韓琦免明堂恩命不允批荅

王珪

予臨路寢之上曾覽八紘邈然有通神明之志迺季秋宗祈既右上帝亦右文考始予齋精臨獻而懼不勝及觀天籟搏在堂鍾石

在庭至陟降上下之數與夫九州四海美物之薦罔不具飭噫何其禮之盛歟非爾元宰之臣敦總裁劑之故已降之制為百辟先亦皇天降休命于我家非予之所敢專也今書固辭顧不廢予惠術之施率

賜郝質免恩命不允批荅

王珪

國家提萬兵之助萃之畿中謀元帥之良護于巖下矧卿嘗從征伐之事加有宿衛之勤宜授鉞於師壇總環宮之夜柝蓋旌勞者必異其寵御衆者必予之權毋為過兢其服重委

賜宰臣富弼乞退不允批荅

王珪

朕肇獲邦圖每恭天戒屬初炎之在序偶時澤之弗滋且止于近畿顧民災之未遠然應不旋日知人事之已修卿還來相予居位未久奚抗章而引咎將援故而辭權雖蹈夫聖賢遠覽之恩殆戾

於君臣交敬之意勉規弗及終底于成

賜歐陽脩乞退不允批荅

王珪

夫與政之途蓋天下之責至者叢矣顧雖智勇不能以禦流弊之來前日御史加非於卿朕惟其辭甚悖於義理之文今讒者放而疑者釋卿猶欲以去位豈朕所望馬傳不云乎禮義不愆何恤人之言其起眎事毋重朕之不敏也

賜宰臣韓絳免恩命不允批荅

元絳

卿方重淳深清明端亮閱文武之二材擴謀猷於百為屬者羌種跳邊王師淹戍往視方略以宣威靈嘉維爾志蔽自朕志絕軼前代比登冢司扶世澤民將倚調於元化靖兵戢亂猶佇建於膚公況惟渙號之孚已穆廣朝之聽胡為懇牘欲避隆名雖難進之風自高冲尚而仰成之屬殊弗顧懷趣宜欽承毋重搗固

賜宰臣韓絳已下上尊號不允批荅 元 絳

朕聞唐虞之世君臣吁俞相與敕戒以康庶事未聞其自耀功德大為名稱以勤天下之聽朕以涼菲獲承皇緒固已極崇高之位號美嚮者奉高宗之祀三事大夫亦屢以微無來上而愧不敢從方且嘉與衆賢夙寤晨興以營極治之業要之萬世建無窮之基亦有無窮之聞不猶愈於虛名歟臣之尊君義則勤至朕守弗奪毋煩數陳

賜皇伯宗諤免恩命不允批荅 元 絳

卿爵齒兼尊德名參劭佑予郊廟之事克有夙夜之勤疇勞策勲時乃舊典往承成命無用勤辭

賜陳升之免恩命不允批荅 元 絳

卿久服樞筦協成王功屢陳誠辭願解幾政方建將旄之重寄且

增台路之華流輔成萬微嘗宣左右之力兼賦二材宜旌文武之護即當欽承安用冲挹

賜宰臣王安石已下乞御正殿復常膳不允批荅 元 絳

垂象之變咎在朕躬內惟菲涼敢不祇懼避朝損膳欽天之渝神休震動銷去大異而三事庶尹咸造在庭願復舊常至于再請且星降畧德猶賴交修况天畏棗忱固當屢省弭裁嚮福其庶幾焉

賜劉摯辭免恩命不允批荅 蘇 軾

政如農耕以既獲為能事言如藥石以愈疾為成功若耕不獲疾不愈朕何望焉所以用卿者非以富貴卿也勉卒成業何以辭為

賜太師文彥博乞致仕不允批荅 蘇 軾

卿出入四世師表萬民無羨於功名而有厭於富貴其所以忘身

御國捨逸就勞者豈有求而然哉凡以先帝之恩生民之欲也
卿之在朝如王在山如珠在淵光景不陳而草木自遂去就之際
損益非輕肯西伯善養老而太公自致魯穆公無人子思之測而
長者去之卿自為謀則善矣獨不為朝廷惜乎藥餌有間特遊廟
堂家居之樂何以異此

再賜太師文彥博乞致仕不允批荅 蘇軾

朕脩身以承六聖虛已以聽四輔而法度未定陰陽未和民未樂
生吏未稱職中夜以思方食而歎雖不敢以事諉元老實望其以
身率百官卿猶未即於安孰敢不盡其力此聖母冲人之本意而
天下有識之所望也昔唐太宗以干戈之事尚能起李靖於既老
而穆宗文宗以燕安之際不能用裴度於未病治亂之效於斯可
見朕意如此卿其少安

賜宰臣呂公著乞外任不允批荅 蘇軾

夫以才御物才有盡而物無窮以道應物道無窮而物有盡凡今
之患所乏非才以卿篤於愛君必能建長久之策澹然無我可以
寄狂直之權二年于茲百度惟正事既就緒民亦小康至於微疾
之屢攻亦高年之常理卿其良食自輔為國少安譬如止水之在
盤豈復勞心於鑿物心且不勞而況於力乎

賜宰臣呂公著乞致仕不允批荅 蘇軾

宰相不自用人主不自為予欲識人物之忠邪故以卿為水鏡予
欲知利害之輕重故以卿為權衡苟明此心雖老猶壯與其輕去
軒冕獨善其身孰若優游廟堂兼享其樂益敦此義勿復有云

賜司空呂公著免恩命不允批荅 蘇軾

夫國以得人為彊如猛獸之衛藜藿以積賢為寶如珠玉之茂山

川湛然無為物自蒙利故崔公發議則淄青慙服知朝廷之有人
獨使抗詞則孫權回顧歎張昭之不在得失之效豈可同日而語
哉朕之用卿意實在此國計之重可無復詞

賜右僕射范純仁免恩命不允批荅 蘇 軾

自昔 先帝之世屢歎材難及朕嗣位以來專用德選雖爵祿名
器出於獨斷而長有成就實在群公長短不遺輔相之責苟無為
國養人之意必有臨事乏使之憂朕用慨然當食不御思得英雋
之老共收文武之用惟卿篤於憂國明於知人灼見朕心宜在此
位往任天下之重毋事匹夫之廉

賜門下侍郎孫固乞致仕不許批荅 蘇 軾

吾不出帷幄臨御家邦實賴股肱之良以持綱紀之要於其進退
顧可輕聽之哉卿頃自近藩擢貳東省本以年德之故非有筋力

之求若夫正顏色出詞氣使人望之而忠誠可信鄙倍自遠斯可
矣豈以一病未能造朝遂欲舍而去哉誠請雖勤於義未也

賜劉昌祚免恩不許批荅 蘇 軾

卿國之虎臣帥我爪士總章大祀宿衛有勞宜為六軍之先以承
大賚之慶辭而不有殊匪吾心

大宋文鑑卷之三十四

制類

除趙普門下侍郎同中書門下平章事集賢殿大學士制
除呂蒙正中書侍郎兼戶部尚書平章事制

李 沆

除文彥博判大名府制

歐陽 脩

除皇弟允初感德軍節度使制

歐陽 脩

封皇弟九女福安公主制

歐陽 脩

除皇兄允弼武康軍節度使制

宋 祁

除皇弟允迪安靜軍節度使制

宋 祁

立皇太子制

張 方平

除皇兄宗諤保靜軍節度使制

張 方平

除韓琦守司徒兼侍中鎮安武勝等軍節度使制

張方平

除呂公弼樞密使檢校太傅制

張方平

除李昭亮殿前副都指揮使寧武軍節度使制

張方平

除魯公亮檢校太傅充樞密使制

胡宿

除王德用樞密使制

胡宿

祁國長公主進封衛國長公主制

司馬光

立皇后高氏制

范鎮

曾公亮加恩制

范鎮

除富弼樞密使制

范鎮

充國公主降沂國公主制

范鎮

韓琦加恩制

王安石

李璋加恩制

王安石

皇伯祖威德軍節度使榮國公承亮加恩制

王安石

李日尊加恩制

王安石

○除趙普門下侍郎同中書門下平章事集賢殿大學士制

閔散同功歸馬遂隆於周道蕭張叶力斷蛇因肇於漢基必資佐命之臣以輔興王之業推忠協謀佐理功臣樞密使光祿大夫檢校太保兼御史大夫上柱國天水縣開國伯趙普功參締造業茂經綸稟象緯之淳精契風雲之良會洎贊樞機之務屢陳帷幄之謀沃心方侔於嘉猷調鼎宜膺於大用俾踐台衡之位仍兼書殿

之榮爾其整乃一心熙予度績君臣相正勿忘獻納之規夙夜在公勉致隆平之化仕服休命無愧前修

除呂蒙正中書侍郎兼戶部尚書平章事制

李沆

天道無私日月星辰助其照皇王不宰股肱輔弼代其工所以端拱守成垂衣制理求寔丕平之景運遐追三代之今猷其有業茂經綸才推謹厚參大政而已濬星歲秉至公而無捨寅昏宜頒出綍之殊恩俾正持衡之重柄爰擇剛日特降命書推忠佐理功臣朝散大夫給事中參知政事柱國東平郡開國男呂蒙正四氣均和五行鍾秀有濟時之略輔之以溫恭挺命世之才守之以循默爰觀舜旌之進善遂指魏闕以來嚴臨軒觀敏瞻之能射策見縱橫之略暨茲於用益著謨明公忠推社稷之巨凝重見廟堂之器

眷茲大體久鬱具瞻屢宣作厲之功克懋秉鈞之績別錫褒功之羨號仍陞馭貴之崇借勳籍增榮井田加賦預烈侯之峻爵同大利之計書願優恩之在茲諒名器之無假於戲雲從龍而風從虎今也其時啓乃心而沃朕心必求諸道爾宜周旋庶政佐佑眇躬緩茲霄旂之憂明我隆平之運同底于道豈不羨歎

除文彥博判大名府制

歐陽脩

朕惟序相之崇資是為文武之極選隆其名器所以重朝廷列于蕃宣所以屏王室矧乃居留之任必屬老成之人爰擇剛長敷告有位具官文彥博器閑而學識粹而明學得其方通古今而知要才周於物道大小以惟宜自奮發於聲猷早更揚於中外居則參卑乎國論出則宣暢乎皇威兩踐台司首當柄用賢愚式序舉百職以咸修綱紀甚明贊萬幾而至悉自懇避鈞衡之任出司管鑰

之嚴遠此逾時蔚然休問眷言邦哲實簡予衷是用更其擁節之
榮委以別京之重勁兵所宿是資總制之權雅俗惟淳燕賴撫綏
之政於戲與國同體是謂股肱之良惟民具瞻方隆師尹之望顧
我舊德豈煩訓辭往其欽哉祗服休命

除皇弟允初依前檢校尚書右僕射充感德軍節度使

加食邑食實封餘如故制

歐陽脩

爵賞常功則為善之勸廣名器不假則至公之道存然而隆恩睦
親所以厚乎風俗建侯作屏所以扞于王家非余敢私乃國舊典
具官允初質性純茂稟乎天姿學問發明由於師訓維我叔父時
為賢王緬懷遺烈之存屬乃克家之善自被蕃宣之寄久參朝請
之聯宜從留務之繁進委臨戎之重節髦並建非賦兼增食謀克
諧寵數惟渥於戲干戈衛社內有宣勤夙夜之臣甲冑在躬外有
奮力行伍之將爾其念宴安之懷毒知富貴之難居戒損於滿而
罔敢自驕勞身以謙而克保其位無忘勗勵往服恩榮

封皇第九女福安公主制

歐陽脩

朕稽有國之彝章著皇女之稱謂取其主以同姓所以見王體之
尊必也錫之美名所以彰禮命之寵載消吉日敷告在庭皇第九
女岐嶷之姿有生知之異稟柔順之質得天性之自然方嚴保傳
之規以養肅雍之德俾遵舊典襲以徽章嘉乃妙齡盛哉儀服考
僉言而惟允非予意之敢私於戲隆仁恩以厚親茲惟教愛習圖
史而循法繫乃夙成祗若訓言往膺渙渥

除皇兄允弼武康軍節度使加食邑食實封制

宋 祁

朕惟一二兄弟屏打吾家每推骨肉之愛以強本根之託矧在邇

屬早休厥聲適及剛辰進膺異數具官允弼甚德而度參仁以和
居貴而罔流心訓恭而遠祇海間陪郊獻佐充宗司抑抑收儀舉
皆率履綽綽斯裕內無違言成予叙親時乃脩職比者雖疏王爵
未厭寵名宜停後務之繁俾領元戎之制增食爰賦兼實幹封於
戲盤石而宗寄莫重焉扞城於國義莫先焉可壯非猷可順非迪
仍輟就藩之遠姑隆緩族之恩往惟懋哉顯對嘉命

除皇弟允迪安靜軍節度使加食邑實封制

宋 祁

朕聞立愛莫先於親繁支實庇其本每念攸訓匪伊異人用推
敦序之典期光夾輔之體具官允迪承燾天祐衍慶宸享舉動
嚴方趨古閑敏思長富貴之守履肆朝夕之虔向留使華允穆公
路項以王邸殂謝予懷悼驚念其堂構眷深橋梓維城有寄墨經

還朝載隆近屬之恩俾領中軍之節仍增邑食且實戶封於戲乃
考之忠勛四邦是式乃兄之光寵十乘有儀爾偕厥榮毋或茲忝
欽即殊獎祇勵遠猷

立皇太子制

張 方平

維我 祖宗繼天統業積有功德克享上帝之心肆其子孫永承
百世之祀朕祇纂謨烈詳覽古今繫崇建於元良實保安於國本
上尊宗廟孝無大於奉先下庇生民教莫逾於居正式宣顯冊敷
告萬邦皇長子具官神宗 廟諱英粹且躋中和自至仁義充涵之義言
動惟時禮樂交錯之華威儀可象抑畏疏封之重敏修典學之勤
亦既多聞足當大受是宜誕膺徽命肇啓儲闈懋升明兩之輝益
廣在三之道非余私於爾神宗 廟諱惟天祐於余家衍寶祚之靈長成
寰區之慶賴往慎厥德以答揚我列聖之光訓不曰休哉可立為

皇太子有司擇日備禮冊命施行

除皇兄宗諤保靜軍節度使制

張 方平

朕惟前王懿德治古舊章必隆蕃屏之親以穆懷柔之體矧君爾屬夙著令名宜揆剛辰誕揚休命皇兄具官宗諤甚德而度參仁以和近雅不流繹如鍾呂之正內明自炤瑩若珪璋之溫率履無違在宗有裕特推恩典之異聿視表儀之光錫爾駢旄屬之瑞節時庸褒叙式昭寵嘉於戲祗畏者保身之末圖恭儉者有家之長業事近効遠罔或忽諸往惟欽哉尚克終譽

除韓琦守司徒兼侍中鎮安武勝等軍節度使制

張 方平

朕光宅萬邦肇新駿命正權綱之遠御審名器之大方眷予宗臣特崇異數以表圖勳之重用昭報禮之隆爰揆剛辰誕揚贊冊具

官韓琦宣昭賢業熙亮天工光翊三朝咸有一德材周五則之用體備四時之和社稷是經文武惟憲在成功而弗處實有大以能謙荐上奏封懇辭政柄顧倚毗之厚詔諭數頌而精懇之堅辭誠難奪增寵上階之峻特開兩鎮之崇蔽自朕心事非舊典當盛辰而均逸望故里以榮歸大業甚明休靈殊渥於戲臣行其志茲為自得之全君篤於恩深惜老成之去無安帥節之樂猶待衮衣之還乃情本朝遐不謂矣

除呂公弼樞密使檢校太傅制

張 方平

本朝之制地分二府之嚴執政之臣共幹庶邦之重文武承式兵民是圖屬在賢明總司使職誕敷明制敷告大廷具官呂公弼器縕純明機靈精遠環材任重中廣厦之棟梁雅音自和合清廟之琴瑟登貳樞機之密洽聞議慮之長屢陳憂國之言多發便時之

策深明王體有簡朕心宜陞帝傳之崇以正本兵之任爰田增賦
真食衍封名器益隆 章允穆於戲信而能用嘗思明哲之難知
無不為期盡臣鄰之益祇若休命以贊大猷

除李昭亮殿前副都指揮使寧武軍節度使制

張 方平

外擁節旄方鎮元戎之重內司禁衛太微上將之雄匪時英材曷
若嘉命圖用親率宜揚大庭具官李昭亮誠稟忠淳風力敏給世
載其德有孤趙之舊勲文定厥祥迺委任之高姓早階華顯允蹈
中和入從法從之華出領翰垣之要屬以軍政契于士心訓撫有
方簡稽元肅眷殿巖之離衛悉王旅之選鋒典茲中權職在圻父
特賜節旄之命爰將注意之隆峻以等威統諸環列於戲齋鉞所
付是為主之爪牙蘭錡之嚴實曰予之心脊勉旃誠報茂對寵休

除魯公亮檢校太尉充樞密使制

胡 宿

經遠慮微必慎制兵之術折衝消難亦資畫策之臣是憲樞躔聿
崇使號蓋政謨之攸寄匪耆哲而莫居適得其人誕敷厥命具官
魯公亮風業碩茂志慮深純學多貫於前言性類修於中道有方
重之德可以托蹠而鎮浮有明達之材可以造幾而成務當講勸
於左右亦召置於禁嚴博我訓言代予明命用請臨於襄輔逆權
典於京師咸有治功遂間政本通明練於百物參知穆於群言貳
公之司又陪於論道內密之任宜正於筦樞仍加傳導之名更益
陪敷之數崇階馭貴真食衍封並示寵章式旌殊禮於戲典機
之任莫慎乎微擊析之言蓋取於豫勿謂承平之久益思備禦之
深祇服斯言往踐乃位

除王德用依前檢校太師同中書門下平章事兼群牧

制置使充樞密使河陽三城節度使加食邑實封仍
改賜功臣制

胡宿

內樞之地上範於斗宮前筋之籌參寄於人傑以經常武之事是
號本兵之司圖冠厥名疇總予務乃眷元侯之長早崇右府之聯
爰擇剛辰復還舊物具官王德用志懷果烈風稜沉雄通於音正
之謀居然英傑之氣春秋閱禮韞義府以惟深甲令書忠載世家
而有舊比膺推轂荐歷干城先干乘以臨戎長萬夫而觀政德刑
具舉威惠參施能名播於外夷沉機隱於敵國歸咨後望權典
機翼濟事功迪宣忠力孚乃誠而匪懈研諸慮以惟微旋均基宥
之勞亟樹藩宣之治蹈險夷而一致服忠孝而兩全簡在朕心洽
於朝聽是用升鳳池之寵秩聯虎節之榮章倚殿輔邦用陪京室
屬右樞之闕職咨群岳以擇材僉曰汝賢宜彌予治蓋天子二老

出以居方伯之尊寰內諸伏入則處公卿之任抑惟曩制舉是隆
名用起壯猷使纂舊服仍峻雲臺之號兼增井牧之封式厚耆英
有加名數於戲樞機發令制戎事以惟艱樽俎折衝經人謀而匪
易往慎乃位益思其忠

祁國長公主進封衛國長公主制 司馬光

帝妹中行易象贊其元吉上姬下嫁召南羨其肅雍命服亞正后
之尊主禮用上公之貴寵光之盛誰昔釋訓誰昔昔也而然矧同

氣之至親推異數而何愛祁國長公主席靈長之緒承濬哲之祥
稟乾坤之粹和鍾日月之明濶淵懿可度柔嘉有章志文功而忘

勞承師教而不倦今王笄在首厭翟戒塗方結悅於皇家將執笄
音煩竹器

於士族宜疏洙土之邑俾適富平之孫庸展茂思誕享
醴化於戲琴瑟靜好式昭和樂之音雷風順承是為常久之道勿

以夫家之平素有虧婦德之聽從祇服訓辭永綏福履

立皇后高氏制

范鎮

天子之有后如天之與地惠養萬物如日之與月臨照四方苟稱
號之弗崇則臣民之安仰京兆郡君高氏生開闢之後而不自矜
大處富貴之習而能安素約服在藩邸宜于家室肆朕續承嘉乃
輔佐惟長樂之奉養左右不可不虔惟六宮之表儀晨夕不可不
肅爰正軒星之位以為國風之倡舉是典冊告於治朝於戲邦教
所基人倫茲重塗山啓夏太任興周勤勞一時焜耀萬世乃其總
筭櫛縱日侍慈顏衡統紘緹時承宗祝庶幾天下之俗知我門中
之私

曾公亮加恩制

范鎮

朕觀前世之載考宗祀之文周漢舊章殘闕無次王鄭異說雜互

莫同大抵奉親以嚴率民以孝交神明於合莫享風俗之本原具
官曾公亮執禮蹈方刺經接古變均太化固已治平制定多儀又
皆節適四時之氣其和見于豆籩九州之力其精在于玉帛使朕
得昭升烈考哀對上靈誠意所通顧饗如答惟時顯相宜有褒
嘉峻借品所以明等威崇衣號所以懋功實陪敦多賦流衍真
封於戲大典越熙至恩胥暨惟裁成輔相以遂萬物之宜惟同夤
協恭以收庶工之效庸昭况施永義基圖

除富弼樞密使制

范鎮

兵布于天下而至衆故統之有本元謀出於堂上而無窮故資之
於明哲是以基于靜密式暢遠猷始乎幾微能成大務若時付畀
茲謂劇艱前推忠協謀同德守正佐理功臣特進行禮部尚書同
中書門下平章事昭文館大學士監修國史兼譯經潤文使上柱

國河南郡開國公富弼文武相資柔剛並適誠貫金石材隆棟梁
往在 先朝嘗為上宰至言無隱精慮有開方國計之是毗以親
喪而遽去況夫西漢而下巨唐以還訖于 本朝凡厥公相率就
起復以為權宜而卿固執禮經懇辭恩詔三年始事四海具瞻再
炳台符之文兼崇樞極之任重陪多賦庸示褒章於戲天命甚難
神器至重始初續紹正賴經綸幸元老之聿來借衆賢而同濟庶
幾涼德罔累慶圖

兗國公主降沂國公主制

范鎮

陳半服之等所以見王姬之尊啓脂澤之封所以昭帝女之寵茲
惟親愛之收屬時乃化風之所關苟不能安諧於厥家則何以觀
示於流俗兗國公主生而甚惠朕所鍾憐故於外家之近親以求
副車之善配而保傳無狀閨門失歡歷年于茲生事弗順達於闕
聽深所駭驚雖然恩義之常人所難斷至於賞罰之際朕安敢私
宜告大庭降從下國於戲惟肅雍以成美德惟柔順以輯令名乃
其恪思庶永來福

韓琦加恩制

王安石

朕祗率舊章肇稱吉禮對越天地具獲靈明之歆相維公卿並膺
休顯之賜其享大號以寵元勳推誠保德崇仁守正協恭贊治亮
節佐運翊戴功臣淮南節度揚州管内觀察處置營田等使開府
儀同三司守司徒檢校大師兼侍中行揚州大都府長史上柱國
魏國公食邑一萬三千七百戶食實封五千戶韓琦躬受偉材出
陪熙運保茲天子進無浮實之名正是國人退有顧言之行閒朝
廷之社稷方域之萬邦辰猷具減器寶加重中辭機軸之要外
即審屏之安行統紘誕備三公服銜之盛縻堯戟轟兼大將威儀

之多序績既崇脩方彌謹協成宗祈之禮豫有顯功之勞肆衍本封申加美稱於戲恩典徽數所以旌帝臣明德茂功所以獎王室往惟勵翼服此褒嘉

李章加恩制

王 安石

若昔大猷紹天明命必有獻享之禮作民恭先必有褒嘉之恩自國貴始翊衛功臣奉寧軍節度使鄭州管內觀察處置河隄等使光祿大夫檢校司空持節鄭州諸軍事鄭州刺史大夫上柱國平原郡開國公食邑四千三百戶食實封一千戶李璋世載忠善躬服儉勤以后家之洪支為帝室之隆棟入總管衛則兵師無譁出乘蕃維則吏屬不怠近付京都之籥外更方鎮之旄貢職惟脩祀儀獲考進加功號申衍邑封以疇服采之勤以協勸勞之典於戲貴富有危溢之可戒祿位匪侈驕之與期圖惟慶譽之終尚協龍

光之施

皇伯祖威德軍節度使榮國公承亮加恩制

王 安石

朕裸獻廟室燎禋郊丘內蒙 祖考之居歆外獲神祇之顧饗嘉我近屬與有陪輔之勞揚于大庭使膺褒顯之福具官承亮德義自表爵齒 兼尊魁然肅艾之材尚矣神靈之胄世承厥慶有躬蓍之芬華朝賴以寧若翰藩之嚴密乃相肆祀實綏思成進加奠食之封申賜詔功之號於戲孝恭可以儀宗察信厚可以化邦人匪時親賢孰朕承翼往有寵獎尚協榮懷

李日尊加恩制

王 安石

朕紹膺駿命稽用上儀祗事郊宮並受三神之福推恩方夏外交四表之歡告于有司錫是在服推誠保節同德守正順化翊戴功

臣靖海軍節度觀察處置等使同中書門下平章事李日尊躬懷
德善世濟忠勤莫茲南邦居有并城之效衛我中國使無疆場之
虞賜之大將之寵昨之真王之爵往踐厥位知欣戴於寵章來獻
其琛用協成於熙事陪敦采邑褰進文階載加真食之封式允
懋功之典於戲人之所助惟怙冒於王靈國以求存顧循守於侯
度率時新命保乃舊邦

